

Peqqussutissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut:

Inatsisartut peqqussutissaattut siunnersuutip matuma siunertaraa makkuninnga suliniuteqarnissaq periarfissiuunniarlugu KNI A/S-ip ingerlataanik annertusisitsinissaq:

1. KNI A/S-ip ullormi 1. januar 2005-imi Nuka A/S-imik tigusinissaa.
2. KNI A/S-ip ullormi 1. januar 2006-imi Royal Arctic Bygdeservice A/S-imik tigusinissaa.
3. KNI A/S-ip nunaqarfinnut nunaqarfinniillu ilaasunik angallassinissamut akuerineqarnissaa, soorlu ilaasunik angallatini nioqqutissanik asiujasunik assartuutini ilaasqarnissamut akuerisaasimasuni ilaasoqarnermikkut.

Tassuunakkut makku tunngavissiuunniarneqarput:

- Nunaqarfinnik sullissinerup inuiaqatigiinnut aningaasartuutaanera sutigut tamatigut akikinnerusoq.
- Sullissinermi suliassat assigiinngitsut pitsaanerusumik ataqatigiissaarneqarnissaat.
- Nunaqarfinnik sullissineq qaffasinnerusoq kiisalu nunaqarfiit pisariaqartitaasa kissaataasalu aammalu sullissinerup neqeroorutigineqartup naapertuunnerusumik ataqatigiissaarneqarnissaat.

2. Siunnersuummi immikkoortut pingaarnert:

Ingerlatseqatigiiffissuup KNI-p ingerlatsinera pillugu aalajangersakkani maanna atuuttuni allassimavoq, ingerlatseqatigiiffissuup ingerlatseqatigiiffii niuerneramik tunngaveqarlutik quersuarniit niuertarfinniillu niuerneramik ingerlatanillu tamatumunnga atasunik ingerlatsissasut.

Ingerlatseqatigiiffissuup ingerlatsinermini ingerlatai taakku siunnersuutikkut annertusineqassapput, taamaalillutik siunissami tassaalissallutik:

1. Quersuarniit niuertarfinniillu niuernerq.
2. Aalisakkanit qalerualinnillu tunisassiassanit, neqaarniat tunisassiaataannit inuussutissanillu allanit nioqputissiorneq, kiisalu taakkununga atatillugu aningaasaliisarnermik ingerlatsineq atuutereersoq.
3. Usinik ilaasunillu nunaqarfinnut nunaqarfinniillu imaatigut assartuineq.

Inatsisartut peqqussutaat maanna atuuttoq naapertorlugu Naalakkersuisut ingerlatseqatigiiffissuup ingerlatseqatigiiffii pisussaaffilersinnaavaat nioqputissanik ulluinnarsiutinik, inuussutissarsiornermut atortunik, ikummatissanik imerpalasunik il.il. pilersuinermit pisortat sullissinerat pillugu niuernermit tunngaveqartumik atugassaqarfiusunik isumaqatigiissuteqartarnissaannut. (§ 2, imm. 3).

Ingerlatseqatigiiffissuup ingerlatseqatigiiffiisa niuernermit tunngaveqartumik atugassaqarfiusunik isumaqatigiissuteqartarnissaannut Naalakkersuisut pisussaaffiliisinnaanerit siunnersuutikkut annertusillugu aammattaaq usinik ilaasunillu imaatigut assartuinermit kiisalu suliffissaqartitsiniarneq annertusarniarlugu suliniutinik, matumani aamma tunitsivinnik tunisassiorfinnillu pilersitsinissamik attassiinnarnissamilluunniit siunertaqartunik ilaneqarpoq.

Tassuunakkut Namminersornerullutik Oqartussat inuiaqatigiit soqutigisaasa isumannaarneqarnissaannik qulakkeerinissaat periarfissinniarneqarpoq.

3. Pisortanut aningaasaqarnikkut allaffissornikkullu sunniutissai:

Siunnersuut imminermini pisortanut aningaasaqarnikkut allaffissornikkullu sunniuteqartussaangilaq. Nunaqarfinnili ingerlatanik ataatsimoortitsinissaq siunnersuutikkut periarfissaalersoq pisortanut, matumani aamma selskabinut pisortanit pigineqartunut aningaasaqarnikkut sunniuteqassaaq. Nunaqarfinni ingerlatanik ataatsimoortitsinissap qanoq ingerlanneqarnissaa, aammalu selskabit attuumassuteqartut nunaqarfinni ingerlatanik ataatsimoortitsinerup periarfissarititaasa iluanni qanoq iliorniarnerminnik aalajangiineri aningaasatigut sunniutissat taakku suunerinut qanorlu ittuunerinut aalajangiisuussapput. Nunaqarfinni ingerlatanik ataatsimoortitsinissami periuserineqartussap, atuutilersitsiniarluni maanna isummersuutigineqartunut aallaaviusup aningaasatigut sunniutissai ersersinniarlugit Mærsk Broker K/S nalunaarusiornikuuvoq. Erseqqissarneqassarli taanna aallaavissaannaammat.

Nalunaarusiaq peqqussutissatut siunnersuummut ilanngunneqarpoq. Nalunaarusiami pingaarnertut naliliineq tassaavoq nunaqarfinni ingerlatanik KNI-p akisussaaffigisassaanik ataatsimoortitsiniarneq "*nunaqarfinni innuttaasut sullinneqarnerannut pitsanngoriaatissanik, aammalu inuiaqatigiit kalaallit ataatsimut isigalugit aningaasarsiornerannut pitsaaqutissanik arlaqartunik nassataqarumaartoq.*"

Royal Arctic Bygdeservice A/S-ip umiarsuaatini ukiut ikittuinnaat ingerlaneranni taarsertussaassavai. Maannakkut sullissinerup annertussusia attatiinneqassappat taarsiinissap 150 mio. kr.-it missinginik akeqarnissaa Maersk Broker K/S-ip nalilerpaa. Taamaattorli Royal Arctic Line A/S-ip Royal Arctic Bygdeservice A/S-illu tusarniaanermut akissutiminni oqaatigaat, sullissinerup annertussusissaatut 2005-imut aningaasanut inatsisissatut siunnersuummi siunniunneqartup kingunerissagaa umiarsuaatit umiarsuarnut marlunnut ikilisinneqarsinnaanerit, tassuunakkullu taarsiinissaannarnut aningaasartuutissat 100 mio. kr.-inik annertussuseqassasut.

Tassunga taarsiullugu umiarsuarnik pisariaqartitanik piffissami aalajangersimasumi attartorsinnaaneq Maersk Broker K/S-ip periarfissaanerarpaa.

Maersk Broker K/S eqqoriaavoq, umiarsuaatileqatigiiffimmik nunamit allameersumik kitaani assartuinnermi nunaqarfinnik sullissinissaq pillugu pivusorsiorsumik isumaqatigiinniaqateqarnissani 42,9 – 42,0 mio. kr.-it missinginik (akit malillugit iluarsineqartartussanik) aningaasartalimmik isumaqatigiissuteqarnissaq anguneqarsinnaassasoq. Taakku saniatigut aamma ilaapput assartuinnermut tunngasunut aningaasartuutit sullissisunullu isumaqatigiissutit. Royal Arctic Bygdeservice A/S-ip kitaani sullissineranut aningaasartuutit 44,9 mio. kr.-iusut naatsorsorneqarsimavoq, taakkulu saniatigut ilanngunneqassapput assartuinnermut tunngasunut aningaasartuutit sullissisunullu isumaqatigiissutit.

Umiarsuit nunaqarfinnik allatut sullissinissaasa atuutilersinneqarneranut atatillugu 5 mio. kr.-it atorlugit prammisisoqartariaqassaaq. Aammattaaq Royal Arctic Bygdeservice A/S-ip atorunnaarneranut aningaasartuutit 13,8 mio. kr.-iunissaat naatsorsorneqarpoq.

KNI A/S-ip naatsorsuutigaa Nuka A/S-ip suliassaataanik isumaginninnermi akissarsianut aningaasartuutinut ukiumut 7 mio. kr.-it missinginik sipaartoqarsinnaasoq, ukiumili atuutilersitsiffiusumi siullermi aningaasartuutaasussat 0,7 mio. kr.-it missaanniissangatinneqartut.

KNI A/S-ip angallatit nioqqutissanik asiujasunik assartuutit 3-t pigereerpai, sulilu 3-nik piseqqinnissani naatsorsuutigalugu. Angallatit nioqqutissanik asiujasunik assartuutit selskabip isorliunerusuni pisiniarfiutaasa nioqqutissanik naammaginartumik pilersorneqarnissaat qulakkeerpaat. Inatsisartut peqqussutissaattut siunnersuut manna isumaqataaffigineqassappat angallatit taakku suli atorluarneqarnerusinnaassapput, tassami aamma (taamaaliornissamut akuersissuteqartoqassappat) ilaasoqarsinnaassagamik taamaalillutillu nunaqarfiit innuttaasa takornariallu pitsaanagerusumik angallanneqarnissaat qulakkiissallugu.

Taakku saniatigut aamma ataatsimoortitsinerup pitsaaqutissai nalilersorneqarsimanningsut selskabinit tikkuartorneqartut arlaqarput:

Makkuninnga ataqatigiissaarineq:

- qerititsiviit/nillartaatsiviit atunngitsut
- assartuinnermut atortut ataatsimoorussat (truck-it il.il.)

- pitsaassutsimik nakkutilliineq Aalborgimi
- nillartaartitsivinnik/qerititsivinnik ikkussuisartumik Kalaallit Nunaannukartitsisarneq
- nunaqarfinni teknikkikkut atortunik aserfallatsaaliineq

Royal Arctic Bygdeservice A/S-ip Royal Arctic Line A/S-illu suleqatigiinneranni pitsaaqutit atuutereersut atuukkunnaarsinnaapput, tassa KNI A/S-ip sullinneqarnernik sunik Royal Arctic Line A/S-imit pisiumanissaa apequtaatillugu. Isumaqatigiinniartoqassappat tamanna niuerneramik tunngaveqarluni atugassaqartitsiffiusumik pissaaq.

Atorfinnik allatut aaqqissuussinerup kingunerisaanik atorunnaarsinneqartunik atorfeqartut tamarmik allanik suliffissarsinngippata isumaginninnikkut aningaasartuutit amerlinissaat naatsorsuutigineqartariaqarpoq. Sulisussat Kalaallit Nunaannut akileraartussaataaangitsut atorneqassappata tamanna akileraarutitigut isertitassanit annaasaqarnermik kinguneqarsinnaavoq, imaluunniit akileraarutit tunngavii sulisut ikilinerat pissutigalugu appariaateqassapput. Nuka A/S-ip Nuummi iniutai maannakkut atugaanermisut atorneqanngippata taakku maannamut naatsorsorneqarsimanngitsunik naatsorsuutitigut nalikillilerneqarnissaat naatsorsuutigineqartariaqarpoq.

4. Inuussutissarsiutinik ingerlataqartunut aningaasaqarnikkut allaffissornikkullu sunniutissai:

Siunnersuut imminermini inuussutissarsiutinik ingerlataqartunut aningaasaqarnikkut allaffissornikkulluunniit sunniuteqassanganinneqanngilaq, aktieselskabit Namminersornerullutik Oqartussanit pigineqartut (KNI A/S, Nuka A/S, Royal Arctic Line A/S aamma Royal Arctic Bygdeservice A/S) toqqaannartumik sunnerneqartussat eqqaassanngikkaanni.

Ataatsimoortitsinissalli nunaqarfinni inuussutissarsiutit ineriartornissaannut periarfissanik, tassa sullissinerup qaffasinnerulerneratigut pitsaanerulersitsinissaa naatsorsuutigineqarpoq. Ilaasunik imaatigut assartuinerup kiisalu nioqqutissat ilaannik imaatigut assartuinerup akulikinnerulernissaat ilaatigut periarfissaalissaaq. Umiarsuit qerititsivillit maannakkut pigineqartut usigisinnaasaasa pingasoriaataannik useqarsinnaasut atorneqalersinnaanerat KNI A/S-ip isumaliutigaa.

Arctic Umiaq Line-ip oqaatigaa, angallatit attartukkat atorlugit uteqattaarluni ilaasunik assartuinissaaq pillugu selskabi ukiut tamaasa namminersortunut angallataatilinnut isumaqatigiissusiortartoq. KNI-p isumaliutigineqartutuut angallatit nioqqutissanik asiujasunik assartuutit ilaasunik angallassissutitut atulissappagit namminersortut angallataatillit aningaasarsiornissamut tunngavissaat annikillissapput, tamannalu angallatit pineqartut akilersinnaasumik ingerlanneqarnissaannut aalajangiisuulluinnarsinnaavoq.

Ataatsimoortitsisoqarpat KNI A/S niuernikkut assigiinngitsutigut aalajangiisuusutut inissisimalersinnaavoq. Nuiernerup tungaatigut aalajangiisuusutut inissisimanermik

atornerluineq unammilleqatigiinneq pillugu Inatsisartut inatsisaanni § 13 naapertorlugu inerteqqutaavoq. Aamma Unammilleqatigiinnermut Ataatsimiititaliaq Inatsisartut inatsisaatigut arlaqartunik piginnaatitaaffiligaavoq, unammilleqatigiinnermut killilersuutaasinnaasut kingunerluutigisinnaasaannik pinngitsoortitsinissamik siunertalinnik.

Ataatsimoortitsinissap atuisut akiliutigisartagaannik annertuumik qaffaanermik sullissinerulluunniit atuutereersup ajorseriarneranik kinguneqannginnissaanik piumasqaat KNI A/S-ip isumaqatigalugu nalunaarutigereepaa.

5. Avatangiisinut pinngortitamullu sunniutissai:

Siunnersuutip avatangiisinut pinngortitamullu imminermini sunniuteqarnissaa naatsorsuutigineqanngilaq. Nunaqarfinnut nunalittarnerit akulikissusiisa allangornerat angallatinillu allanik atuilernissaq avatangiisinut sunniuteqarsinnaasutut eqqarsaatigineqarsinnaapput, tamatumali avatangiisit eqqissisimatitsinerlu pillugit aalajangersakkat atuuttut killissarititaasa iluanni taamaallaat pinissaa naatsorsuutigineqarpoq.

6. Innuttaasunut allaffissornikkut sunniutissai:

Siunnersuut innuttaasunut allaffissornikkut sunniuteqartussaangilaq. Tamatumani naatsorsuutaavoq Royal Arctic Line-ip usinik assartuinermini aqutsissutaasa atorineqarnissaat, kiisalu assartuineq il.il. pillugit qanimut ataqatigiissarinissap pilersinneqarnissaa Royal Arctic Line A/S-ip KNI A/S-illu isumaqatigiissutigissagaat.

Ataatsimoortitsinissap atuisut akiliutigisartagaannik annertuumik qaffaanermik sullissinerulluunniit atuutereersup ajorseriarneranik kinguneqannginnissaanik piumasqaat KNI A/S-ip isumaqatigalugu nalunaarutigereepaa.

7. Naalagaaffeqatigiinnermut namminersornermullu attuumassuteqartut:

Siunnersuut inuiaqatigiit aningaasaqarniarnikkut sipaaruteqarnissaannik kinguneqassaaq, taamaalillunilu aningaasarsiornikkut imminut napatilernissamik anguniagaqarnermut, namminiilernissap anguniarneqarnerani qitiusumut iluaqutaassalluni.

8. Oqartussaasunik kattuffinnillu il.il. tusarniaaneq:

Siunnersuut oqartussaasunut kattuffinnillu il.il. makkununga tusarniaassutigineqarpoq:

- Aningaasaqarnermut Pisortaqarfik

- Avatangiisinut Pinngortitamullu Pisortaqarfik
- Naalakkersuisut Allattoqarfiat, Inatsisileriffik
- Naalakkersuisut Allattoqarfiat, Nunami namminermit pissutsinut Allaffik
- Akileraartarnermut Pisortaqarfik
- Ineqarnermut Attaveqaqatigiinnermullu Pisortaqarfik
- Aalisarnermut Piniarnermullu Pisortaqarfik
- Inuussutissarsiornermut, Nunalerinermit Sulisoqarnermullu Pisortaqarfik
- Ilaqutariinnermut Pisortaqarfik
- Peqqissutsimut Pisortaqarfik
- Kultureqarnermut, Ilinniartitaanermit, Ilisimatusarnermut Ilageeqarnermullu Pisortaqarfik
- Aqutsinermit Pisortaqarfik
- Nunanut allanut Pisortaqarfik
- Aatsitassanut Pisortaqarfik
- KANUKOKA
- KANUNUPE
- KNI A/S
- Nuka A/S
- Royal Arctic Line A/S
- Royal Arctic Bygdeservice A/S
- Arctic Umiaq Line A/S

Siunnersuut immikkut ittumik ullunik quliinnarnik piffissaliilluni tusarniaassutigineqarpoq. Tusarniaanermi akissuteqarnissamut piffissaliussa sivilunerussagaluarpat siunnersuut maannakkut ataatsimiinnermi suliarineqarsinnaanaviangikkaluarpoq, tamannalu selskabinut sunnigaasussanut annertuumik kingunerlussagaluarluni.

Makkua tusarniaanermut akissuteqarput:

- Aningaasaqarnermut Pisortaqarfik
- Naalakkersuisut Allattoqarfiat, Inatsisileriffik
- Naalakkersuisut Allattoqarfiat, Nunami namminermit pissutsinut Allaffik
- Akileraartarnermut Pisortaqarfik
- Aqutsinermit Pisortaqarfik
- Ineqarnermut Attaveqaqatigiinnermullu Pisortaqarfik
- Aalisarnermut Piniarnermullu Pisortaqarfik
- Inuussutissarsiornermut, Nunalerinermit Sulisoqarnermullu Pisortaqarfik
- Peqqissutsimut Pisortaqarfik
- Kultureqarnermut, Ilinniartitaanermit, Ilisimatusarnermut Ilageeqarnermullu Pisortaqarfik
- Aatsitassanut Pisortaqarfik
- KANUKOKA
- KNI A/S
- Nuka A/S
- Royal Arctic Line A/S
- Royal Arctic Bygdeservice A/S
- Arctic Umiaq Line A/S

Peqqissutsimut Pisortaqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqarfik, Aatsitassanut Pisortaqarfik, Aalisarnermut Piniarnermullu Pisortaqarfik kiisalu Nunami namminermi pissutsinut Allaffik siunnersuummut oqaaseqaatissaqannginnerarput. KANUKOKA-p siunnersuut isumaqataaffigaa. Kommuneqarfiit kattuffiat isumaqarpoq peqqussutissatut siunnersuut nunaqarfinnik sullissinerup aammalu KNI A/S-ip Nuka A/S-imik tigusineratigut nunaqarfinni isorliunerusunilu aalisakkanit qalerualinnillu tunisassiassanik nioqqutissiornerup pitsaanerulernerannik kinguneqarumaartoq. Aammattaaq kommuneqarfiit kattuffiata oqaatigaa, tigusineq aalisakkanit qalerualinnillu tunisassiassanik nioqqutissiornerup aamma "nunaqarfiit nioqqutissiaannik" nunap iluani nunanullu allanut tunisaqartarnerup pitsaanerusunik ataqatigiissaarneqarsinnaanissaannut periarfissatsialaassagunartoq.

Tusarniaanermi akissutit tiguneqarsimasut allat siunnersuutip suliarineqarnerani ilanngunniarneqarput.

Taamaattorli Nuka A/S-ip aningaasaliisarsinnaanermik ingerlatsinissamik kissaataa ilaannakuusumik akuersaarneqarpoq, tak. § 1, nr. 1-imut oqaaseqaatit.

Taakku saniatigut ingerlatsinermik aqqissuussinissaq tassungalu atatillugu aningaasatigut naatsorsuutigisat pillugit oqaaseqaatit ilanngunneqarsinnaasimanngillat. Tassunga patsisaavoq Inatsisartut peqqussutaata taamaallaat ingerlatseqatigiiffissuup KNI-p ingerlatsinermi periarfissaanik imaqarnera. KNI-p niuerneramik aallaaveqarluni nammineq isumagisassaraa ingerlatseqatigiiffissuup ingerlanneqarnera, taamaallaat aningaasanut inatsimmit aammalu atuisut akiliuteqartarnerisa annertuumik qaffannginnissaanik sullissinerulluunniit pioreersup ajorseriannginnissaanik piunasaqaammit pituttorneqarluni. Taassuma aamma nassatarissavaa umiarsuarnik attartorsinnaaneq angallatinilluunniit il.il. pisisinnaaneq pillugit apeqqutit KNI-mit aalajangiiffigineqartussaanaissaat.

Siunnersuutaagallartoq tusarniaassutigineqartoq Naalakkersuisut 11. juni 2004-mi tunngaviusumik aalajangiussaannik tunngaveqarpoq. Tamanna pissutigalugu siunnersuutaagallartoq aalajangersakkanik KNI-p Arctic Umiaq Line A/S-ip nunaqarfinnut angallassineranik tigusisinnaanissaanik siunertaqartunik imaqarpoq. Naalakkersuisut tunngaviusumik aalajangiinerminnut uiggiullugu nunaqarfinni ingerlatanik ataatsimoortitsinissamik isumaliutaaqqaartup aningaasatigut kingunissai erseqqissumik paasiumallugit Maersk Broker K/S naliliisissimavaat. Naliliineq taanna tunngavigalugu Naalakkersuisut aalajangerput Arctic Umiaq Line A/S ataatsimoortitsinissami ilaatinneqartariaqanngitsoq. Taamaallutik ajornartorsiutit tusarniaanermi akissutigineqartuni eqqartorneqartut ataasiakkaat soqutiginaataarutereerput.

Peqqussutissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut:

§ 2, imm. 1-ip oqaasertassaatur siunnersuutigineqartoq ingerlatseqatigiiffissuup KNI-p ingerlataanik annertusisitsineruvoq.

Aalajangersagaq maanna atuuttoq naapertorlugu ingerlatseqatigiiffissuup KNI-p selskabiutai niuernermik tunngaveqarlutik quersuarniit niuertarfinniillu niuernermik, ingerlatanillu tassunga atasunik ingerlatsisuupput.

Aamma aalisakkanit qalerualinnillu tunisassiassanit, neqaarniat tunisassiaannit nerisassanillu allanit nioqqutissiornerup kiisalu tassunga atatillugu aningaasaliisarnermik ingerlatsinerup pioreersup aalajangersakkami ilaatinneqalernissaat siunnersuutaavoq. Tassuunakkut KNI A/S-ip Nuka A/S-imik tiguisinnaanissaa periarfissinneqarpoq.

Nuka A/S-ip ileqqoreqqusai maannakkut atuuttut naapertorlugit selskabip siunertaraa aalisakkanit qalerualinnillu tunisassiassanit, neqaarniat tunisassiaannit nerisassanillu allanit nioqqutissiornermik niuernermillu, aammalu siulersuisut naliliinerat malillugu taakkununga assingusunik ingerlatsinissaq kiisalu aningaasaliisarnermik ingerlatsinissaq.

Aningaasaliisarnermik ingerlatsineq pillugu Nuka A/S-ip tusarniaanermut akissummini oqaatigaa, selskabi angallatinik nutaanik pisinermut arlaleriarluni taarsigassarsisitsisimasoq. Tassuunakkut siunertaasimavoq amerlanerusunik tunitsivigineqarnissamik tunisallu pitsaassusiisa qaffasinnerunissaannik qulakkeeriniarneq. Periarfissap taassuma attatiinnarneqarnissaa selskabip neriuutigaa. Selskabi taarsigassarsiariteriikkaminik atorunnaarsitsisariaqalissappat taamaaliornissap kingunerluutigisinnaasai selskabip immikkut pingaartillugit taavai.

KNI A/S-ip ingerlataasa aningaasaliisarnermik ingerlatsinermik ilaqarnissaat pisariaqartutut naleqquttutulluunniit isigineqanngilaq, tassa aalisakkanit qalerualinnillu tunisassiassanit, neqaarniat tunisassiassaataannit nerisassanillu allanit nioqqutissiornermut nalinginnaasumik immikkulluunniit ittumik attuumassuteqartumik. Matumani eqqarsaatigineqanngillat aningaasaliisarnissamik isumaqatigiissutit pioreersut (tassa imaappoq aningaasaliisarnissamik isumaqatigiissutit Nuka A/S-ip Inatsisartut peqqussutaata atuutilerfissaa sioqqullugu isumaqatigiissutigisimasai). Siunnersuut tassunga naapertuuttumik ilusiligaavoq. Taamaammatt Nuka A/S-ip malittarisassai allanngortillugit taamaallaat aningaasaliisarnermik ingerlatsinerup pioreersup selskabip siunertaani ilaatinneqalernissaa naatsorsuutigineqarpoq.

Aalajangersakkap aammattaq usinik ilaasunillu nunaqarfinniit nunaqarfinnillu imaatigut assartuinermik ilaqartinneqalernissaa siunnersuutaavoq. Tassuunakkut

siunertaavoq KNI A/S-ip Royal Arctic Bygdeservice A/S-imik tiguisinnaanissaa. Siunertaavortaaq KNI A/S-ip nunaqarfinnut nunaqarfinniillu usinik ilaasunillu angallassinermik ataatsikkoortitsinnaanissaa, soorlu angallatit nioqutissanik asiujasunik assartuutit ilaasunik assartuinnermut akuerineqarsimasut atorlugit.

Royal Arctic Bygdeservice A/S-ip KNI A/S-imit tiguneqarnermini aterminik allangortitsinissaa naatsorsuutaavoq.

§ 2, imm. 2-p allangortinneqarani ingerlaannarnissaa siunnersuutaavoq. Aalajangersakkami allassimavoq ingerlatseqatigiiffiit ingerlatseqatigiiffinni aqutani tamakkiisumik ilaannakuusumilluunniit pigisaminni suliffeqarfiit allat suleqatigalugit allanillu ateqartitsillutik ingerlatsinertik pineqartoq ingerlassinnaagaat.

§ 2, imm. 3-p oqaasertassaatur siunnersuutip kingunerisaanik Naalakkersuisut ingerlatseqatigiiffissuup KNI-p ingerlatseqatigiiffiutaasa niuerneramik tunngaveqartumik atugassaqartitsiffiusumik isumaqatigiissuteqartarnissaannik pisussaaffiliisinaanerat annertusissaaq.

Aalajangersakkami maannakkut atuuttumi allassimavoq Naalakkersuisut ingerlatseqatigiiffiit nioqutissanik ulluinnarsiutinik, inuussutissarsionermullu atortunik kiisalu ikummatissanik imerpalasunik il.il. pilersuinermi pisortat sullissinerat pillugu niuerneramik tunngaveqartumik atugassaqartitsiffiusumik isumaqatigiissuteqartarnissaannut pisussaaffilersinnaagaat.

Aalajangersakkap aammattaaq usinik ilaasunillu imaatigut assartuinnermik kiisalu suliffissaqartitsiniarnerup annertusarneqarnissaanik suliniutinik, matumani aamma tunitsivinnik tunisassiorfinnillu pilersitsinissamik attassiinnarnissamilluunniit siunertaqartunik ilaneqarnissaa siunnersuutaavoq.

Tassuunakkut qulakkearniarneqarpoq Namminersornerullutik Oqartussat, ingerlatseqatigiiffissuup KNI-p ingerlatseqatigiiffiutaasa inuiaqatigiit soqutigisaannik isumaginninnissartik siunertaralugu sullissinissamik isumaqatigiissuteqartarnissaannik pisussaaffiliisinaanissaat.

Isumaqatigiissutit niuerneramik tunngaveqartumik atugassaqartitsiffiunissaasa kingunerissavaat selskabip pineqartup ilaatigut isumaqatigiissutip kingunerisaanik selskabimut aningaasartuutinik (pisariaqartunik) matussusiisariaqarnera, ilaatigullu aamma naammaginartumik iluanaaruteqarsinnaanissaa. Naammaginartumik iluanaarutip suuneranut ilaatigut aalajangiisuussapput suliat tungaasigut niuernikkullu pissutsit (selskabip nammattariaqagai eqqarsaatigalugit). Naliliinermi aamma ilaassaaq unammilleqatigiinneq pillugu inatsisip aalajangiisuusutut inissisimanermik atonerluinissamut inerteqqutaa.

Nr. 2-mut:

Inatsisartut peqqussutaanni maanna atuuttumi § 3 atorunnaartussatut siunnersuutaavoq sunniutaarunnissaa pissutigalugu. Aalajangersagaq ima oqaasertaqarpoq:

"§ 3. Ingerlatseqatigiiffissuarmi KNI-mi ingerlatseqatigiiffiit KNI Pilersuisoq A/S-ip aamma KNI Pisiffik A/S-ip ingerlataasa ingerlanneqarnerat tigussavaat.

Imm. 2. TELE Attaveqaatit A/S-ip Kalaallit Allakkeriviata ingerlanneqarnera KNI Pilersuisoq A/S-imit ingerlanneqartoq kingusinnerpaamik 1. januar 1998-imi tigussavaa.

Imm. 3. KNI A/S-ip siulersuisui KNI Pilersuisoq A/S-ip umiarsuaateqarnermik bilitsearniarfinnillu ingerlatsinermik ingerlataqarnerminik unitsitsinissaa pillugu pilersaaruserlutillu naalakkersuisunut inassuteqaasiussapput. Naalakkersuisut umiarsuaateqarnermik bilitsearniarfinnillu ingerlatsinerup tamakkiisumik ilaannakuusumilluunniit tunniunneqarnissaannik isumaqatigiissutit akuersissutigisinnaavaat, piumasaqaatigalugu nunaqarfinnik isorliunerusunillu ilaasunik angallassinikkut usinillu umiarsuartigut assartuinikkut sullissinerup ingerlaannarnissaat isumannaarneqassasut."

§ 2-mut

Inatsisartut peqqussutissaata ullormi 1. januar 2005-imi atortuulernissaa siunnersuutaavoq.